



Lysebo, Jarle

Saksbehandlar, innvalstelefon

Solveig Kalvø Roald, 5557 2327

Svar på søknad om diverse tiltak Reppadalen naturreservat

Statsforvaltaren gir løyve til enkel rydding av einer på setervollen Seimsetra og til legging av kloppar i Reppadalen naturreservat. Det er knytt vilkår til løyvet.

Vi syner til e-post frå deg med søknad/spørsmål om at speidarane i Arna kan gjennomføre diverse tiltak i Reppadalen naturreservat, og til synfaring i området 15.6, der dei ulike tiltaka blei diskutert.

Det de ønsker å gjennomføre er følgjande:

1. Klippe/sage ned einer på setervollen rundt Seimsetra
2. Klippe/sage ned einer langs stier i dalen.
3. Sage ned bjørk for bruk som ved i vår nymonterte rentbrennende vedovn.
4. Legge ut klopper for å komme tørrskodd over myrpartier der det allerede er stier.

Oppfølgingsspørsmål:

1. Hvis ja, kan vi da samle greiner og bar i hauger til rotning? (minst mulig synlig selvsagt)
2. Hvis ja på punkt 4, kan klopper være laget av impregnert materiale?

Statsforvaltaren si vurdering:

Spørsmål 1-3 og oppfølgingsspørsmål 1:

I utgangspunktet er det er forbode å fjerne planter og plantedelar frå reservatet. Jf kapittel IV, pkt 1 i verneforskrifta som er knytt til naturreservatet. Vegetasjonen, også daude busker og tre, er freda mot skade og øydelegging utover det som følgjer av tillaten ferdslø eller tiltak i medhald av punkta V-VII.

Jf § 48 i naturmangfaldlova kan forvaltingsmynde imidlertid gjere unntak frå eit vernevedtak om det ikkje er i strid med vernevedtaket sitt føremål og ikkje kan påverke verneverdiane nemneverdig, eller om omsyn til sikkerheit eller omsynet til vesentlege samfunnsinteresser gjer det nødvendig.



I § i naturmangfoldlova blir det òg sagt at : Prinsippa i §§ 8 til 12 skal leggst til grunn som retningslinjer ved utøving av offentlig mynde, mellom anna når eit forvaltningsorgan tildeler tilskot, og ved forvaltning av fast eigedom. Vurderinga etter første punktum skal gå fram av vedtaket.

Hovudføremålet med vernet av området var å «ta vare på eit område med store og velutvikla myrkompleks, med døme på atlantisk nedbørsmyr, flatmyr og bakkemyr». Det er dermed ikkje avgjerande for føremålet med vernet at vi tar vare på einer og bjørk i reservatet. Tvert i mot var det på vernetidspunktet ein god del mindre tre og busker enn det er i dag og vi ønskjer i utgangspunktet at området skal ha ei ope preg slik det hadde då.

Fjerning av einer frå stølsvollen, og langs stien vil difor vere eit tiltak som i seg sjølv ikkje kjem i konflikt med verneverdiane i området. De bør likevel ha ein plan for korleis de handterer einer som er kutta ned. Det må ikkje ligge att store mengder med einer ute i terrenget. De kan som de nemner i søknaden samle dette i mindre haugar som blir plassert slik at dei er lite synleg. Det kan òg vere aktuelt å brenne greiner og bar. Dette må i så fall skje på vinteren, i område der bålet ikkje gjev skade på vegetasjonen i reservatet.

Forsiktig uttak av bjørkeved til brenning i vedomnen på Seimssetra er heller ikkje problematisk jamfør verneverdiane. I verneforskrifta kapittel V. pkt 3 blir det òg presisert at vernereglane ikkje er til hinder for «Drift av skogen på fastmark utanfor randsona (jf pkt VI.1) med dei avgrensingar som følgjer av, eller har heimel i, lov om skogbruk og skogvern».

Spørsmål 4:


Utlekking av kloppar er i utgangspunktet heller ikkje i tråd med verneforskrifta . Jf kapittel IV, pkt 3: Det må ikkje setjast i verk tiltak som kan endre naturmiljøet, som t.d. oppføring av bygningar, anlegg og faste innretningar, .. , bygging av vegar, ... Opplistinga er ikkje utfyllande.

Basert på det vi veit om naturmangfoldet i området så vil ikkje eit slikt tiltak påverke naturmiljøet eller verneverdiane i nemneverdig grad så lenge klopplegging blir avgrensa til enkeltområde der det alt går sti som er ein del i bruk (jf naturmangfoldlova § 8). Utlekking av kloppar vil vere aktuelt langs stien som går (sør)austover frå Seimssetra (om lag traseen som er vist med blå linje i kartet under). Denne traseen ligg i område som ikkje er definert som myr, men som fastmark (myrområde er vist med blå-kvit-stripe skravur i kartet). Utlekking av kloppar i dei våtaste partia her vil kunne ha ein positiv effekt , då vi med dette kan unngå at stien blir utvida i dei våte partia. Vi vil derfor opne for at de legg ut kloppar i eit avgrensa omfang i tilknytning til stien som alt er etablert her.

På synfaring den 15.6 blei det òg diskutert om det var mogleg å legge kloppar i våte område aust for denne stien, slik at dette ga tilkomst til Reppaskaret i aust, noko som opnar for ein fin rundtur gjennom reservatet, opp til Reppaskaret og tilbake til bebyggelsen i Arna over Repparåsen og Tunesfjellet. Partiet lengst aust i reservatet er svært vått/myrete, dels definert som myr i grunnkartet. Om ein skal gå denne vegen må ein passere ein god del sig frå sør som renn inn til myra og det vil krevje mykje kloppar for å kunne gå tørsodd her. Det er mogleg at kloppar i dette området vil kunne påverke desse siga, og vatnet sin veg inn til myra. Det er i dag lite ferdsla i dette området, og sidan dette er eit naturreservat ønskjer vi i utgangspunktet ikkje å legge til rette slik at ferdsla i enkeltområde aukar i særleg grad. Sidan vi heller ikkje har oversikt over korleis dette vil påverke verneverdiane i reservatet vil vi, med bakgrunn i § 9 i naturmangfoldlova (føre-var-prinsippet) ikkje gje løyve til legging av kloppar i denne delen av reservatet. Så vidt vi kan sjå er det mogleg å få ein rundtur med tilkomst til Reppaskaret frå sørsida av reservatet, sjølv om dette blir ein lengre tur. Det er òg tilkomst til Reppaskaret frå nordsida av reservatet. Som du sjølv har opplyst om



er ikkje passasjen som kryssar myra nordover mot Ådnasetra/Gjerdasetra (vist i kartet under) veldig våt, sjølv om det er definert som myr her.



Kartutsnitt frå Fylkesatlas.

Oppfølgingsspørsmål 2

Av materialar, kan vi berre tillate at de nyttar trevirke som er lovleg i sal. CCA-impregnert trevirke kan dermed ikkje nyttast. Vi vil heller ikkje tilrå at de nyttar Kopar-impregnerte materialar, sjølv om det er lovleg å selgje desse. Det vil uansett bli noko avrenning av kopar til reservatet frå slike materialar, og heller ikkje Kopar er eit heldig stoff å få ut i naturen. Kopar-impregnerte materialar vil òg bli øydelagde over tid (sjølv om dette går fortare med uimpregnerte materialar), og når desse ein gang skal erstattast, må slike materialar handsamast som spesialavfall. Det kan dermed vere arbeidssparande over tid å ikkje nytte slike materialar.

Det beste ville sjølvsagt vere om de kunne nytta materialar frå vyrke som blir rydda i området, men vi ser at dette kan vere vanskeleg å få til i praksis.

Anna

Vi set pris på at de tok kontakt med oss for å avklare dette på førehand, og vi er opne for å diskutere eventuelle andre planar de har i dette området. Ta gjerne kontakt om det er noko de lurar på som gjeld naturreservatet.

Vedtak

I medhald av Forskrift om freding for Reppadalen naturreservat kap IV punkt 1 og 3 og kapittel V punkt 3 og § 48 i naturmangfaldlova gir vi løyve til følgjande tiltak i Reppadalen naturreservat:



- Fjerning av einer frå stølsvollen på Seimssetra og langs stien. Nedkutta einer må samlast i haugar som plasserast slik at dei er lite synleg. Om greiner og bar skal brennast må dette skje på vinteren, i område der bålet ikkje kan skade vegetasjonen i reservatet.
- Forsiktig uttak av bjørkeved til brenning i vedommen på Seimssetra. Greiner og pas handterast på same måte som einer.
- De kan legge ut kloppar i eit avgrensa omfang i våte område i tilknyting til stien som alt er etablert frå Seimssetra og (sør)austover (om lag traseen som er vist med blå linje i kartet over). Det blir ikkje gitt løyve til klopplegging andre stader i reservatet.
- Det skal ikkje nyttast impregnerte materialar til dette arbeidet.
- For tiltaka einerrydding og klopplegging ber vi om enkel fotodokumentasjon, med før- og etterbilete av tiltaka innan to månadar etter at dette er gjennomført.

Vi gjer merksam på at dette er eit løyve etter verneforskrifta til naturreservatet og etter naturmangfaldlova. Privatrettslege høve gjeld uavhengig av desse, og tiltaka som er nemnt over må derfor òg avklarast med grunneigar.

Dette er eit einskildvedtak som kan klagast på etter reglane i forvaltingslova. Eventuell klage skal stilast til Miljødirektoratet, men sendast om Fylkesmannen i Vestland, og må vere sendt innan 3 veker etter at klagar er kjent med vedtaket.

Med helsing

Eline Orheim
Seksjonsleiar

Solveig Kalvø Roald
seniorrådgjevar

Dokumentet er elektronisk godkjent